

အပိုကပိုကါ

AWIG-AWIG

ကမာက အမာကါ ကိမ် ကာကိကါ။

DESA ADAT BESANG KANGIN



ကိမ်မာမာကါ ကွဲးကွဲး

KECAMATAN KLUNGKUNG

ကာကွဲးကွဲးကွဲးကွဲး

KABUPATEN KLUNGKUNG

မာမာကါ၊ ကွဲးကွဲးကွဲး

TAHUN 2022



Logo Desa Adat Besang Kangin

Bucu lima ngalingkehin pantun lan gamet sane kagambel tur madaging pita masurat Desa Adat Besang Kangin. Pantaraning pantun lan gamet wenten gelung kori agung saha natar jimbar. Baduur gelung kori agung wenten swastika kalingkehin asta dala. Warna kuning emas, pelung, gadang, putih, miwah coklat ngawe mikatin logo inucap.

Teges niasa ring logo:

1. Bucu lima: Panca Sradha pinaka tatwaning ajahan Agama Hindu

2. Iketan Pantun lan gamet kagambel tur madaging pita masurat Desa Adat Besang Kangin: Desa Adat Besang Kangin, krama lan wargan nyane raket tur tunggil nyalantaraan kuripan nyujur kalanduhan lan kagemuhan sakala lan niskala.
3. Gelung Kori Agung: Desa Adat Besang Kangin wantah pinaka genah suci ngamargiang sukerta tata kuripan ajahan agama Hindu miwah pinaka panaweng ngamargiang sahananin swadarma kuripan.
4. Swastika: niasa agama Hindu utawi krama warga Desa Adat Besang Kangin ngamargiang tata-titi ajahan Agama Hindu Dresta Bali.
5. Warna Kuning: Kadigjayan/kaluhuran.
6. Warna pelung: kasujatian.
7. Warna gadang: kajagathitan.
8. Warna barak: kaprawiran.

Teges pamicutet Logo:

Krama, warga Desa Adat Besang Kangin puluk ngamargiang ajahan Agama Hindu Dresta Bali kacihna antuk ngamargiang Panca Sradha pinaka tatwaning Ajahan Agama Hindu. Jeroning kuripan, krama lan warga raket kalih tunggal nyujur kalanduhan lan kagemuhan sakala niskala. Puniki sida nyalantara prade Desa Adat Besang yukti kaangge genah suci ngamargiang sukerta tata kuripan ajahan agama Hindu miwah pinaka wawidangan ngamargiang sahananin swadarma kuripan nyalantaraang kadigjayan, kasujatian, kajagathitan, lan kaprawiran.

AWIG-AWIG DESA ADAT BESANG KANGIN

KECAMATAN KLUNGKUNG

MURDA CITTA

Om Swastyastu,

Om Awichnam astu nama sidhām,

Malarapan asung kertha wara nugraha Ida Sang Hyang Widhi Wasa, kacihna antuk gilik saguluk cita nirmala warga, sida kasurat Awig-awig Desa Adat BESANG KANGIN. Awig-awig pinaka bungkah pamikukuh desa adat sajeroning midabdabin kalih nyagra kasukretan desa adat rawuhing warga. Awig-awig pinaka dharma prawerti ngrajegang Sang Hyang Aji Agama melarapan Tri Hita Karana lan dresta.

Sajawaning dresta inucap pamekas Pancasila, Undang-undang Dasar 1945, tata titi miwah adnyanan sang rumaga guru wisesa tan kalempasin antuk awig-awig puniki. Mogi-mogi wastu sida mikolihang manut patitis.

Om Santih, Santih, Santih Om.

Besang Kangin, 26 Maret 2022

Olih,

Krama Desa Adat Besang Kangin

BANTANG AWIG-AWIG

Murdaning Awig-awig	
Niasa Desa Adat saha suksmannyane	1
Murdha Citta	3
Bantang Awig-awig	4
Sargah Pratama	
ARAN MIWAH WAWIDANGAN DESA ADAT	6
Sargah Kalih	
PAMIKUKUH MIWAH PATITIS	6
Sargah Tiga	
SUKRETA TATA PARAHYANGAN.....	7
Palet 1: Dewa Yadnya	7
Palet 2: Rsi Yadnya	13
Palet 3: Manusa Yadnya.....	15
Palet 4: Pitra Yadnya	15
Palet 5: Butha Yadnya.....	21
Sargah Patpat	
SUKRETA TATA PAWONGAN	23
Palet 1: Indik Krama	23
Palet 2: Indik Prajuru.....	30
Palet 3: Indik Kulkul	39
Palet 4: Indik Paruman	41
Palet 5: Indik Padruwen Desa	44

Palet 6: Indik Pawiwahan	47
Palet 7: Indik Nyapihan	49
Palet 8: Indik Santana	50
Palet 9: Indik Warisan	51
Palet 10: Indik Panyanggran Banjar	54
Sargah Lima	
SUKRETA TATA PALEMAHAN.....	55
Palet 1: Karang, Tegal, Carik, miwah Setra	55
Palet 2: Indik Wawangunan	56
Palet 3: Indik Wawalungan	57
Palet 4: Indik Kakayonan	58
Palet 5: Kareresikan Desa Adat	59
Sargah Nemnem	
WICARA, BHAYA, DUSTA, LAN PAMIDANDA	60
Palet 1: Indik Wicara	60
Palet 2: Indik Bhaya miwah Dusta	61
Palet 3: Indik Pamidanda	63
Sargah Pitu	
NGUWAH UWUHIN AWIG-AWIG	65
Sargah Kutus	
SAMAPTA	66
LEPIHAN	

SARGA KAPERTAMA

ARAN MIWAH WAWIDANGAN

Pawos 1

Desa puniki mawasta Desa Adat Besang Kangin kacihna antuk nomor registrasi 1388 ring lepihan Perda Provinsi Bali Nomor 4 Tahun 2019 tentang Desa Adat di Bali.

Pawos 2

1. Desa Adat Besang Kangin ngawidangin tunggal banjar adat, inggih punika Banjar Adat Besang Kangin ;
2. Wawidangan Desa Adat Besang Kangin mewates nyatur:
 - ha. Sisi Kangin : Tepi kauh Tukad Unda;
 - na. Sisi Kelod : Tepi kaja Desa Adat Semarapura lan Desa Adat Sangkan Buwana;
 - ca. Sisi Kauh : Tepi kangin Desa Adat Besang Kawan Tohjiwa;
 - ra. Sisi Kaler : Tepi kelod Desa Adat Akah.

SARGAH KALIH

PATITIS MIWAH PAMIKUKUH

Pawos 3

Desa Adat Besang Kangin ngemanggehang pamikukuh:

- ha. Pancasila ;
- na. Undang-Undang Dasar Republik Indonesia warsa 1945 ;
- ca. Ilikita utawi uger-uger sakeng guru wisesa mapaiketan desa adat;

ra. Trihita Karana manut ring Tatwaning Buwana Agung.

Pawos 4

Desa Adat Besang Kangin ngamanggehang patitis:

ha. Ngukuhang miwah ngerajegang Sang Hyang Agama;

na. Nginggilang tata Prawertin Magama ;

ca. Ngrajegang kesukertan Desa Adat, warga desa saha Pawongan nyane sami, sekala lan niskala.

SARGAH TIGA

SUKRETA TATA PARAHYANGAN

Palet 1: Dewa Yadnya

Pawos 5

1. Pura Kahyangan Desa Adat Besang Kangin lan pujawalin nyane, inggih punika:

ha. Kahyangan Desa :

- (1) Kahyangan Tiga: Pura Puseh: Buda Wage Klau Pura Desa: Buda Wage Klau Pura Dalem Agung: Buda Kliwon Paang;
- (2) Pura Prajapati: Buda Kliwon Paang ;
- (3) Pura Uluning Banjar: Tilem Sasih Kasanga;
- (4) Pura Dalem Sakti Pingit: Buda Wage Klau ;
- (5) Pura Buwitan: Wraspati Wage Sungsang;
- (6) Pura Taman Sari: Purnama Sasih Kapat;
- (7) Palinggih ring Pempatan: Tilem Sasih Kasanga;
- (8) Pura Taman Pasucian Pura Puseh: Buda Wage Klau;
- (9) Palinggih Pasimpangan Ida Batara ring Ped: Buda Wage Klau;

- (10) Palinggih Pasimpangan Mlanting: Purnama Sasih Kapat;
 - (11) Palinggih Pangadang-adang: Anggara Kliwon Medangsia ;
 - (12) Pasimpangan Ulun Danu: Purnama Sasih Kapat;
 - (13) Panyiwian Palinggih Masceti: Buda Wage Klau.
2. Soang-soang Pura Kahyangan Desa Adat Besang Kangin kaprebea olih desa adat;
 3. Tawur Kesanga ring Desa Adat Besang Kangin kamargiang ring Catuspata.

Pawos 6

Aturan marupa atos, sesangi, marupa barang mentah, punia, piranti uparengga miwah sekeluirnia patut kedruwe olih Desa Adat, kasuratang olih Prajuru Desa adat.

Pawos 7

- ha. Warga Desa Adat Besang Kangin utawi pamedek patut ngupadi kasukertan kalih kasucian kahyangan;
- na. Sane tan kalugra ngranjing ka pura inggih punika:
 - (1) Sang sebel ring raga sangkaning ngraja swala, durung lintang 42 rahina yening ngembasang putra,sane lanang sampun kepus pungsed ;
 - (2) Cuntaka mawit saking kalampusan manut sengker ;
 - (3) Jadma sane kasinanggeh leteh luire : Beling tan kasinangaskara, jadma buduh, sakit ila sadurung polih kaprayascita manut agama ;
 - (4) Ubuh-ubuhan sajabaning mapaiketan ring upakara ;
 - (5) Sang mabusana sane tan patut manut tata susila ngranjing ka Pura ;
 - (6) Makta sahanan barang sane sinanggeh leteh manut agama ;

(7) Sahanan sane tan kapatutang manut pararemutawi sane kabaos ngletehin

ca. Pratingkah sane tan kapatutang ring Pura:

(1) Masumpah utawi naap cor ;

(2) Maujar ala, ulah ala, wak parusi, nemah utawi misuh ;

(3) Majaljal, mayuda punapi malih jantos metu rah kabaos leteh ;

(4) Ngagah wastra, pusungan miwah macecepin rare ;

(5) Ngagah wastra, pusungan kangkat majeng sang sulinggih, pragina sane pacang ngayah ;

(6) Makoratan, mabanyu, makolem lanang istri masarengan dados asiki, macumbana matemu rasa, masanggama miwah sakancannia sane siosan;

(7) Mangan nginum rauh ketaluhan.

ra. Warga utawi pamedek mabukti ngaletihin wenang kadanda ;

ka. Kahyangan sane keni kedurmanggalaan kadi ring sor :

Panca kerubuhan, kesiratan rah jadma, kehanan wangke sato ageng, wangkening manusa, sehananing lulut lan simbar, mangku utawi sang sane ngemanggihin digelis nyadokang majeng Prajuru, mangda marumang krama Desa adat, pacang ngawentenang pangupakara sepatutnya, manut panugrahan Ida Sulinggih;

da. Warga Desa Adat karawuhan sane ngawinang kasinangkawonan digelis kapintonin manut pararem tur tan lempas ring sastra lan agama, maka jalaran muktiang jati tan jatinnia, yan prade tan jati wong karawuhan inucap patut kapidanda manut pararem.

Pawos 8

INDIK MANGKU

Soang-soang Pura sawewengkoning Desa Adat Besang Kangin, patut kaadegang mangku.

1. Tata ngadegang mangku :

- ha. Lanturan keturunan mangku, tur katuku keluarga lan kasumangkemin warga desa
- na. Prade nenten wenten saking keturunan, wenang nyanjan utawi nunas bawos ring natar pura ;
- ca. Prade nenten polih saking nyanjan, kamargiang sasudian desa majeng warga desa ;
- ra. Prade nenten polih antuk sasudian, kangkat antuk pinunas tur molihang pasumangkeman desa ;
- ka. Kawintenin olih Ida Sulinggih tur kaupasaksi prajuru rauh krama desa ;
- da. Rikala Mangku sampun seda, pangeladan mangku kamargiang olih Mangku, pamuput seosan kengin olih Sulinggih.

2. Warga sane tan kangkat kaadegang mangku :

- ha. Sang cedangga;
- na. Mabukti salah laku;
- ca. Nenten polih pasumangkeman krama desa.

3. Sang kaadegang mangku Pura risampun ngamargiang pawintenan weweg sapatut nyane, sang kaadegang mangku siaga ngamargiang swadarma kapamangkuan;

4. Sajeroning mangku lanang ngamargiang amongan swadarma, puluk kawantu olih mangku istri, prajuru, lan saya.

Pawos 9

SWADARMANING MANGKU

1. Ngutamayang ngamargiang swadarma kapamangkuan ring pura genah kaadegang;
2. Nabdabin sahanan pamargin upakara lan upacara ring pura genah kaadegang sane kaadungan majeng prajuru desa ;
3. Siaga ngrombo pamargin mangku siosan manut pabuat lan kawenangan ;
4. Stata siaga manados tatuladan warga desa ;
5. Stata tureksa ring jeroning pura tur siaga ngarauhang sahanan sane patut karauhang majeng prajuru Pura ;
6. Nuntun warga desa mangda satinut majeng dresta sane kamanggehang ring Pura utawi sane kamargiang sawewidangan Desa Adat Besang Kangin .

Pawos 10

1. Mangku Pura patut polih pangrombo mangku-mangku siosan pura inucap. Mangku-mangku Dadia utawi paibon kangkat ngrombo prade sampun katambyakan ring paruman ;
2. Mangku pamucuk keni piambeng rikala galah ngamargiang swadarma pamargi yadnya, patut kagentosin manut panemaya mangku lan karauhang olih bendesa utawi prajuru ;
3. Mangku sane keni ujar ala, ulah ala, patut maprayascita, sang ngeninin kadanda manut pararem ;
4. Mangku sane kebuktiang amungpang paraning laku, nyasar ring sesana, tan wenang kasepuh.

Pawos 11

Olih – olih mangku luwirnia :

1. Kaping singgih manut linggih tur sesanania ;
2. Polih aturan sesari sane kapupulan sakeng bakti sakesidan pamedek ;
3. Polih olih-olihan siyosan saking aturan ikrama manut pararem ;
4. Luput sahanan peson-peson rauh panyilidihin nyane kadi peson-peson krama ayah ngarep ;
5. Pawintenan, pngeladan pawintenan, lan papelebonan katanggung desa adat.

Pawos 12

1. Mangku kagentosin, sangkaning:
 - ha. Seda ;
 - na. Sungkan rahat ;
 - ca. Pinunas tur sampun polih uwak-uwakan ;
 - ka. Kanorayang.
2. Mangku sane kanorayang patut kadanda tur ngawaliang pawintenan manut kawentenan ;
3. Mangku ngalap rabi sangkaning rahayu, rahayu katampenin, prade lempas patut kadanda ;
4. Mangku kaambil rabi, patut kaselehin tur pamutus pamargi kaanutan antuk daging saseleh;
5. Mangku sane ngarepan yadnya atiwa-tiwa patut ngamargiang nyepuh pawintenan sadurung ngamargiang swadarma kapamangkuan kadi patut.

Palet 2: Rsi Yadnya

Pawos 13

1. Warga sane mapikarsa pacang nyujur padwijatian, patut ngarauhang pisadok majeng Bandesa utawi prajuru Desa Adat Besang Kangin ;
2. Bandesa utawi prajuru desa adat patut ngadungang paridabdab pamargi nyujur padwijatian;
3. Sang sampun madwijati patut nginutin sadaging awig-awig lan dresta sane kanton kamanggehang. Kawentenan puniki stata kauratiang warga tur prade piwal sagelis kabawosin ring jeroning paruman ;
4. Sang pacang mepodgala utawi meduwijati sadurungne patut polih panugrahan saking Parisada Hindu Dharma lan kantor Agama, maka cihna pacang mepodgala inucap sampun wus ketitenin, katureksain indik sehanan kewentenan/paweruh lan pawongania tan ngelepasin kadi kecap sastra dresta, saha keweruhan manut agama lan sesana sane pacang kemargiang ;
5. Prajuru patut nitenin/nureksain mungguhing kewentenan, inggihan laksana sang pacang mapodgala, mangda jati tan lepas ring kecaping Agama ;
6. Sang sampun madwijati lepas ring kecaping agama, prajuru wenang tan ngeraremin ;
7. Risampun puput upakarania tur naben Ida sampun mepica parab, prajuru patut ngawedar indik lan pamargin sang putus madwijati ;
8. Sang mewinten sane pacang ngemargiang Nyonteng, Dalang, Ngusadain, patut masadok ring prajuru, prajuru wenang ngawas nitenin kewentenan tur nyaksiang upakarania. Selanturnia prajuru wenang ngawedar indik tetujon pemargi sang melaksana, rauhing ringwates wewidangania ;

9. Ida sang putus sane keadegang pinaka Siwa (Guru Loka Pala Sraya), antuk Desa kepatutang kadi ring sor :
 - ha. Upakara pediksan lan pretiwan Ida riwekas kelaksanayang olih krama ;
 - na. Pinaka panuntun krama Desa ring indik Tatwa lan Upakara Agama ;
 - ca. Muputang upakara ring Kahyangan utawi upakara ring Krama Desa ;
 - ra. Tan patut muputang upakara/yadnya, sane kantun sajeroning wicara.

Pawos 14

1. Bandesa lan Prajuru patut nuntun warga desa adat nyinggihang sang sampun maraga maekajati, madwijati, lan jana sane patut kasinggihan ;
2. Warga rikala nguntap utawi nuur, utawi ngulem sang sampun maraga maekajati, madwijati, lan jana sane patut kasinggihan patut karihinin antuk atur pinunas rauh saruntutan nyane ;
3. Warga sane nguntap utawi nuur, utawi ngulem sang sampun maraga maekajati, madwijati, lan jana sane patut kasinggihan, patut inut ring pamargi dresta Desa Adat Besang Kangin ;
4. Pamargi Adat, Agama, Budaya sane antes katunasang, patut katunasang manut pabuat majeng sang sampun maraga maekajati, madwijati, lan jana sane patut kasinggihan ;
5. Warga Desa Adat Besang Kangin patut maturan, mapunia, utawi ngamargiang darma paayah-ayahan majeng sang sampun maraga maekajati, madwijati, lan jana sane patut kasinggihan manut pabuat.

Palet 3: Manusa Yadnya

Pawos 15

1. Manusa yadnya inggih punika upacara/upakara darmaning manusa ngawit saking petemuning kama bang kelawan kama petak, sejeroning garba wadaning ibu, jantos lampus riwekas ;
2. Upacara/upakara manusa yadnya :
 - ha. Mapawarangan
 - na. magedong-gedongan ;
 - ca. kepus puser utawi lepas awon ;
 - ra. tugtug kambuhan ;
 - ka. telubulanan ;
 - da. otonan ;
 - ta. makutang bok ;
 - sa. raja singa/raja swala ;
 - wa. matatah ;
 - la. masakapan ;
 - ma. mabayuh ;
 - ga. mawinten.
3. Upacara/upakara manusa yadnya mangda ngutamayang dresta Desa Adat Besang Kangin utawi sangkaning pituduh Ida Sulinggih sane kaangkenin Desa Adat Besang Kangin.

Palet 4: Pitra Yadnya

Pawos 16

1. Sehanan upakara pemeretekan sang lampus kebawos Pitra Yadnya ;
-

2. Upacara pamretekaan sang lampus, luire mersihin sawa, mendem, ngeseng sawa, atiwa-tiwa, kelanturang antuk pengeroras, rauh ngelinggihang ring parahyangan Dewa Sang Bhatara.
 3. Pemargi mendem sawa utawi ngaben ring Desa Adat Besang Kangin kadi ring sor:
 - ha. Krama utawi warga sane lampus ring wawidangan Desa Adat Besang Kangin patut kaupapira ring setra Desa Adat Besang Kangin. Sang piwal patut kabawosin ring paruman. Prade wenten krama utawi warga lampus ring dura desa adat Besang Kangin, kasukserahang manut tatujon sang aduwe kaduhkitan.
 - na. Pemargi padewasan mendem utawi atiwa-tiwa kamargiang sajabaning pasah lan pujawali ring Kahyangan Tiga
 - ca. Warga lampus rikala pucak wali ring Kahyangan Desa utawi ring Dadia, pamendeman kamargiang risampun puput pamargi puja wali.
 - ra. Nenten kadadosang ngajangin mendem lan nginepang bangbang. Ngajangin inggih punika mendem sawa langkungan ring adiri ring galah arahina mabinayan galah mamargi ke setra ;
 - ka. Prade wenten seda nyambung risampun wenten mapendem, pamargin pamendeman kamargiang malih tigang rahina ;
 - da. Yan mendem sawa nepek sampun patedunan ka Pura Kahyangan Desa utawi Dadia, sang lampus patut kasuluban tanpa suaran kulkul tur kamargiang rikala sampun engseb surya utawi sadurung endag surya;
 - ta. Yan wenten lampus nepek ring rahina pujawali pura kahyangan desa ngantos nyineb, sang lampus patut kamenengan ring genah kaduhkitan utawi kangkat kasiliban manut kawentenan. Risampun nyineb wawu kangkat preteka sang lampus manut kawentenan ;
-

- sa. Sang lampus nepek sampun tedun ngayah ka Pura rauhing nyineb, prade pacang kaplebonang patut ngangge padewasan sane pinih tampek sawusan nyineb ;
- wa. Warga lampus rikala warga utawi krama banjar ngamargiang karya ayu, pamargine sami-sami mamargi.
- la. Warga sane sampun katambyakan mangku prade seda tan kangkat kapendem, pamargine patut kaplebonang, sane kasanggra olih sang ngadegang pinaka mangku.

Pawos 17

1. Sang lampus sangkanin salah pati, ulah pati, pamretekan nyane pateh makadi sang lampus biasa. Paweweh nyane wantah wenten wawantenan pangulap ring genah kalampusan utawi manut kawentenan ;
2. Sang lampus ngadut bobotan kapendem risampun embas bobotan nyane. Ngembasang bobotan kangkat katanganin antuk pabuat medis :
3. Warga sane lampus sangkaning pinungkan pacang nularin, paridabdab nyane mangda nganutin sang wenang ;
4. Sang lampus sadurung embas utawi wawu embas, papendeman nyane pateh makadi patut.
5. Warga sane lampus ring genah tan patut, sang maduwe kapatutan patut maridabdabin genah kalampusan manut pituduh sang wenang sane kadabdabin olih bendesa utawi prajuru desa adat :
6. Tamiu lampus ring wawidangan Desa Adat Besang Kangin patut kasukserahang majeng guru wisesa tur sang maduwe kapatutan patut mapiadung majeng Bandesa

lan Prajuru Desa Adat. Prade nenten wenten ngangkenin, upakara sapatut nyane kasanggra Desa Adat Besang Kangin ;

7. Tamiu nenten kadadosang ngamargiang upacara Pitra Yadnya ring wawidangan Desa Adat Besang Kangin sajabaning wenten nyarengan saking warga Desa Adat Besang Kangin tur kadulurin antuk batu-batu manut pararem ;
8. Warga nenten kangkat nyekeh lintang ring padewasan pinih nampek prade pacang ngaben dadakan utawi mendem.

Pawos 18

Swadarmaning warga ritatkala katiben kelayuan :

1. Gelis mapisadok majeng Bandesa mangda molihang pamargi ngalantur ;
2. Bandesa patut maritatas pemargin sang kelayuan manut kewentenania,
3. Krama patut ngremba sang kalayuan sane kadabdabin olih Bandesa ;
4. Sarwa prateka nabdabin sawa patut kamargiang banban, sutrepti, kadulurin pangrastiti olih warga. Sang murug wenang kadanda manut daging sangkepan.

Pawos 19

1. Sawa sane dados kaabenang inggih punika sawa sane sanistane sampun mayusa apupak ;
 2. Sawa sane ring soring apupak kaupakara antuk :
 - ha. Ngwarak karuron : karuron durung marupa ;
 - na. Nglangkir : sampun marupa durung embas sampun lampus ;
 - ca. Nglungah : sampun embas tur durung ketus untu utawi durung apupak ;
 - ra Rupa upakara ring ajeng kapastika olih Ida Sulinggih ayat pasemetonan utawi sang anangun yadnya.
-

Pawos 20

Dudonan nangun yadnya atiwa-tiwa :

- ha. Paigum adung pangrencana olih sang aduwe karya sareng Prajuru Desa ;
- na. Mutusang adung pangrencana olih sang aduwe karya sareng Prajuru Desa ;
- ca. Ngamargiang pangrencana manut daging putusan pangrencana ;
- ra. Ngarauhang pertanggungjawaban olih sang aduwe karya majeng warga ;
- ka. Ngamargiang saseleh sajeroning nincapang pamargi salantur nyane.

Pawos 21

1. Atiwa-tiwa ring Desa Adat Besang Kangin kangkat kamargiang antuk ngerit, niri ;
2. Atiwa-tiwa ngerit kamargiang nemuning sasih karo manut kawentenan, antuk pakeling nenten kadadosang sawa kapendem langkungan ring 5 warsa;
3. Atiwa-tiwa ngerit kamargiang kinembulan ring Desa Adat Besang Kangin ;
4. Rikala ngamargiang Atiwa-tiwa ngerit kinembulan, tan kadadosang wenten ngamargiang niri ;
5. Atiwa-tiwa niri kangkat kamargiang rikala dadakan utawi rikala nenten ngerit.

Pawos 22

Rikala ngaben masa utawi dadakan nenten kadadosang ngarauhang panyanggra marupa lanjutan, sane seosan mamargi manut kawentenan.

Pawos 23

1. Pamargin patus:

- ha. rikala lampus molihang patus marupa jinah mapengarga 2 kg beras. Krama utawi warga tan kapatutang ngejot brana;
 - na. rikala plebon ngerit, pangambilan lan prabea katanganin Desa Adat. Satunggil sangkep krama ngamedalang cingkrem plebon. Pangambilan karya patut ngucukang upakara sapatutne;
 - ca. sang lampus kaplebonan dadakan wantah molihang patus kalampusan manten inggih punika marupa jinah mapengarga 2 kg beras;
 - ra. Patus lampus lan plebon ngerit nenten wenten pawales patus.
2. Rikala atiwa-tiwa masa, pakaryan patuse kadi ring sor:
- ha. Makarya uparengga atiwa-tiwa ;
 - na. Ngamong sapula-pali upakara ;
 - ca. Ngawantu rikala ngebet ;
 - ra. Nabdabin tatakan api sategep nyane ;
 - ka. Nyandang uparengga, eteh-ete upakara ring puncak ngaben, ngantos ngamargiang pangesengan.
 - da. Mangda sami eedan pamargi yadnya antar, eedan yadnya kadabdabin antuk paigum sang aduwe yadnya sareng prajuru desa.
3. Tigang rahina risampun ngamargiang ngaben, sang nangun yadnya patut :
- ha. Ngamargiang pacaruan eka sata brumbun magenah ring :
 - (1) Setra ;
 - (2) Karang pumahan;
 - (3) Ring bale banjar rikala ngangge bale banjar
 - na. Prade wenten panglantur pamargi ngoras, kangkat ngamargiang pacaruan.

Pawos 24

Sane patut molihang patus inggih punika warga sane kangkat kaplebonang.

Pawos 25

1. Warga sane cuntaka tan kadadosang ngamiletin parikrama suci ;
2. Sang kahanan cuntaka :
 - ha. Sebel raga : cuntaka ngantos puput tur kacihna sampun mabersih ;
 - na. Karuron : cuntaka ngantos 42 dina, sane lanang 12 dina ;
 - ca. Kalayusekaran: cuntaka warga ngawit kaswaraang kulkul mabersih ngantos tigang rahina.
 - ra. Nganten : cuntaka ngantos sampun mabayakawonan ;
 - ka. Maduwe oka : sane istri cuntaka ngantos akambuhan, sane lanang cuntaka ngantos akepus pungsed.
3. Sane tan keni lan tan ngenen cuntaka inggih punika warga sane sampun madwijati lan sane sampun maekajati manados Mangku sane kaadegang Desa Adat Besang Kangin.

Palet 5: Butha Yadnya

Pawos 26

1. Bhuta yadnya inggih punika upacara-upacara pabiyakalaan ring ibu pertiwi lan kahyangan, sarwa prani miwah ring sarwa bhuta ;
2. Upacara-upacara pabiyakalaan ring sarwa prani inggih punika :
 - ha. Upakara majeng entik-entikan utawi punyan-punyanan nemuning Tumpek Pengarah utawi tumpek Pengatag (Saniscara KliwonWariga) ;

- na. Upacara majeng ubuh-ubuhan nemuning Tumpek Kandang (Saniscara Kliwon Uye).
3. Upacara-upacara pabiyakalaan ring Ibu Pertiwi miwah kahyangan lan ring sarwa bhuta kawastanin macaru. Pecaruan inucap minakadi pacaruan :
- ha. Ekasata;
- na. Pancasata;
- ca. Rsigana ;
- ra. Pancasanak ;
- ka. Pancakelud ;
- da. Balik sumpah ;
- ta. Tawur Agung utawi Malabuh Gentuh.
4. Pamargin Upacara pacaruan inucap ring ajeng (3) nganutin kecaping agama, pemargine nganutin dresta Desa Adat Besang Kangin tur pamutus Ida Sulinggih sane kaangkenin Desa Adat Besang Kangin.

Pawos 27

Upacara Tawur Kesanga patut kelaksanayang kadi ring sor :

1. Ring Catus pata kewentenang pecaruan Panca Sata ;
2. Ring soang-soang paumahan, nganutin tetiwak guru wisesa ;
3. Nyoreang ngewentenang pengerupukan mebuu-buu, tur kapidabdab olih prajuru ;
4. Ring rahina penyepian patut ngemargiang brata penyepian sekadi :

ha. Amati geni ;

na. Amati karya ;

ca. Amati lelungan ;

- ra. Amati lelangon ;
5. Sane murug brata penyepian patut keni pamidanda manut perarem sejawaning sane polih lelugrahan manut wigunania kalih kekobetannia, saha lingga tangan saking prajuru ;
 6. Ring rahina pangembak geni, mapiteges pangelukatan bratha sekadi, soang-soang kerama patut nunas pengaksama ring kadangnia, lan makacihna pangawit dewasa Isaka Warsa ;
 7. Sehananing brata penyepian, sane ketitenin olih Prajuru patut kamargiang olih pecalang (tanda).

SARGAH PATPAT

SUKRETA TATA PAWONGAN

Palet 1: Indik Krama

Pawos 28

1. Krama Desa Adat Besang Kangin inggih punika jana sane mipil utawi kasurat ring bacakan Desa Adat Besang Kangin ;
2. Warga Desa Adat Besang Kangin inggih punika krama rauhing angga kakuwuban krama Desa Adat Besang Kangin ;
3. Tamiu inggih punika jana satios warga sane ngranjing utawi jumenek ring wawidangan Desa Adat Besang Kangin

Pawos 29

Manut tategenan lan kawentenan pakulawargan, krama Desa Adat Besang Kangin kabinayang manados :

- ha. Krama Ngarep Jangkep inggih punika krama sane kantun tegap lanang istri pakurenannia tur malinggih nenten malinggih ring wawidangan desa adat. Krama puniki matetegenan weweg ;
- na. Krama Ubuh Angkep inggih punika anak-anaking krama lanang lan istri sane sampun antes ngamargini ayah krama katedunang nyelosin rihantuk guru rupakannyane tan kantun. Krama puniki matetegenan weweg.
- ca. Krama Balu Angkep inggih punika krama balu sane kajangkepin olih anaking nyane sane beda jenis kelamin tur sampun antes ngamarginin ayah krama. Krama puniki matetegenan weweg.
- ra. Krama Arirang Lanang inggih punika krama lanang rauhing angga kakuwuban nyane sane antes ngamargiang ayah krama pateh pada lanang. Krama puniki nenten keni ayahan luh, marupa jinah kadi patut;
- ka. Krama Ngampel inggih punika krama sane naur ayah-ayahan antuk wawilangan jinah. Sane kangkat ngampel inggih punika krama sane malinggih puluk ring dura kabupaten utawi selat segara.
- da. Krama Nyada inggih punika krama sane sampun mayusa 65 warsa rauh sauripa tur bacakan tegteg kantun kasurat. Sahanan ayah-ayahan krama luput.
- ta. Krama Puri inggih punika krama sane mawit sakeng Puri Agung Klungkung. Krama puri matetegenan makadi krama ngarep sajabaning sane mapakayun manados krama ngampel utawi sane sampun madwijati utawi madeg Dalem.

Pawos 30

Panemaya tedun makrama:

1. Krama tedun anyar mawit saking warga sane mawiwaha ka purusa ;

2. Warga sane mawiwaha kapurusa tedun anyar, katedunang risampune mawiwaha sampun 42 rahina ;
3. Desa Adat Besang Kangin nampenin krama anyar sane mawit sakeng dura desa. Warga dura desa sane kangkat katampenin inggih punika warga sane sampun majangkepan alaki rabi tur maduwe paumahan ring wawidangan Desa Adat Besang Kangin. Krama puniki katedunang rikala wenten paparuman kacihna antuk naur panukun pipil mapengarga 200 kg beras becik.

Pawos 31

Krama wusan makrama sangkaning :

- ha. camput ;
- na. Pinunas ngraga tur sampun polih wak-wakan ;
- ca. Balu luh;
- ra. Kanorayang.

Pawos 32

1. Krama wusan makrama antuk pinunas ngraga tur molihang wak-wakan, risampune:
 - ha. Nyukserahang swalapatra pajanten raga nunas wusan makrama ;
 - na. Nyukserahang swalapatra tan ninggal tategenang ring desa adat sane kaembasang olih Bandesa adat ;
 - ca. Nyukserahang swalapatra desa adat sane nampenin madesa adat ;
 - ra. Matur piuning malarapan pajati kaenter mangku ring pura desa ;
 - ka. Nyukserahang swalapatra nenten nunas pah-pahan olih-olihan desa adat.

2. Krama wusan makrama antuk pinunas ngraga tur molihang wak-wakan, prade mawali malih antes katampenin makrama antuk gaguat :
 - ha. Prade sadurung limang warsa nguncar-ancir, krama inucap keni panguncar-ancir manut pararem;
 - na. Nyukserahang swalapatra sakeng bandesa utawi prajuru adat genah makrama ;
 - ca. Matur piuning malarapan pajati kaenter mangku ring pura desa.

3. Krama kanorayang prade mawali makrama, antes katampenin yening tegep nginutin ngaguat makadi :
 - ha. Nunas pangampura ring jeroning paruman ;
 - na. Nyukserahang swalapatra nenten mabuat piwal ;
 - ca. Naur panuku jalarang kakanorayang kawewehin antuk naur panuku arta brana padruwen desa adat ;
 - ra. Maupasaksi malarapan guru piduka sane kaenter mangku ring pura desa.

Pawos 33

1. Swadarma tamiu:
 - ha. Mapisadok majeng prajuru tan kasep ring arahina ;
 - na. Naur punia manut pararem ;
 - ca. Nginutin kasukertan Desa Adat Besang Kangin.

 2. Swadikara tamiu :
 - ha. Polih pangayoman Desa Adat Besang Kangin ;
 - na. Polih ayah-ayahan manut pabuat.

 3. Krama utawi warga sane ngaraksa tamiu patut nabdabin tamiu inucap mangda tan lempas ring uger-uger desa adat ;
-

4. Tamiu sane piwal kategenang olih warga utawi krama sane ngaraksa tamiu inucap.

Pawos 34

1. Krama utawi warga sane maduwe karya ayu utawi ala, kangkat nunas pitulung majeng krama utawi nyelang bale banjar pinaka genah makarya ;
2. Krama utawi warga sane maduwe karya ayu utawi ala, kadadosang nyelang bale banjar kemawon, upakara banjar kamargiang kadi patut ;
3. Krama utawi warga sane nyelang bale banjar pinaka genah makarya nenten kakenin prabeya sakemawon bale banjar mangda bersih ;
4. Nyelang lan ngawaliang genah patut saha uning Bandesa utawi prajuru desa.

Pawos 35

Tingkahing sane kepatutang sampun dados ngayahang desa :

1. Sampun alaki rabi ngantos mayusa 65 warsa ;
2. Angga kakuwuban krama sane sampun antes ngamarginin ayah. Antes tan antes katureksian olih Bandesa utawi prajuru desa.;
3. Anak-anaking krama utawi angga kakuwuban sane dados ngayahang karihinin antuk pisadok krama ring jeroning paruman utawi sangkepan.

Pawos 36

1. Saya inggih punika lilitan krama sane ngamong swadarma manut pituduh bendesa utawi prajuru desa ;
2. Saya maswadarma ngarauhang dadauhan majeng krama sangkaning pituduh prajuru, lan ngaturang cane rikala parum utawi sangkep ;

3. Saya lanang maswadarma muputang saurah-arih ring pwaregan rikala maolahan, marerisak ring jeroning Pura. Saya istri maswadarma ring pwaregan rikala krama istri makarya sanganan lan upakara sategep nyane miwah nyarengin marerisak ring jeroning Pura tur nyiagaang toya anyar ;
 4. Saya maswadarma ngawantu pakaryan satedun nyanggra wali ngantos nyineb, utawi sangawit pangambilan karya kantos puput malarapan lilitan ;
 5. Saya maswadarma ngawit sangkepan ngantos sangkepan sane pacang rauh ;
 6. Saya nenten ngmarginn swadarma keni dadosan nikel ;
 7. Swadarmaning saya:
 - ha. Ngemargiang arah malarapan titah Bandesa utawi prajuru adat ;
 - na. Ngamedalang banten cane satunggil paruman utawi sangkepan ;
 - ca. Ayah-ayah saya kadadosang kaayahang olih warga desa adat Besang Kangin sane sampun utawi kantun antes ngamarginin ayah ;
 - ra. Arah-arrah wantah patut karauhang majeng sang sane sampun ngamargiang ayah-ayah krama saking angga pakulawarga kakuwuban nyane ;
 - ka. Tata ngamargiang arah-arrah :
 - (1) Matetengaran antuk ucap pangastungkara ;
 - (2) Risampun kasaur, nyantenang raga lantur ngarauhang arah-arrah ;
 - (3) Prade nenten polih pisaur sang aduwe paumahan sane sampun antes ngamarginin ayah krama, sang saya patut ngenahang sawen ring pamedal utawi pamesu paumahan antuk entik-entikan.
 8. Swadarmaning saya :
 - ha. ngayahin lan muputang pakaryan manut amongan ;
 - na. wawanengan dados saya asasih ;
-

- ca. yening wenten piambeng ritatkala nyanggra karya ayu ring Desa Adat, pemargi saya kelanturang ring lilitan selantur nyane. Ngamedalang canengan nyane polih ring sane ngelanturang ;
- ra. yan wenten nyeledihi saya, kangkat kakuwuban utawi warga Desa Adat Besang Kangin.

Pawos 37

- 1. Anak-anaking krama Desa Adat Besang Kangin mangda mapendidikan sanistane saundagan Pendidikan Dasar ;
- 2. Anak-anaking krama Desa Adat Besang Kangin prade wenten pialang ngalanturang pendidikan sanistane saundagan Pendidikan Dasar, desa adat patut ngutsahayang.

Pawos 38

- 1. Pajangkepan lan pakurenan mangda ngutsahayang maduwe oka ngantos wenten Ketut ;
- 2. Wastan pungkusan lilitan oka mangda nganutin :
 - a. Wayan, Putu ;
 - b. Made, Kadek, Nengah ;
 - c. Nyoman, Komang ;
 - d. Ketut manut ririgan ;
- 3. Ngembasang oka patut nginutin uger-uger guru wisesa.

Palet 2: Indik Prajuru

Pawos 39

1. Prajuru Desa Adat Besang Kangin inggih punika Bandesa , Patajuh, Panyarikan, Patengen, soang-soang adiri ;
2. Bandesa Adat inggih punika krama sane pinaka pucuking krama lan warga tur kaadegang ring jeroning paruman olih krama ;
3. Patajuh, Panyarikan, lan Patengen kasudi olih Bandesa, kadarmatimbangan majeng Sabha Desa lan kasumangkemin ring jeroning paruman;
4. Tata titining ngadegang Bandesa lan prajuru desa adat kadasarin antuk Pararem Panuntun Ngadegang Bandesa lan Prajuru Desa Adat Besang Kangin ;
5. Prajuru desa adat ngamargiang swadarma malarapan gilik saguluk, paras paro sarpana ya ;
6. Bandesa wenang nyudi staf administrasi umum lan administrasi keuangan manut pabuat.

Pawos 40

Gagwat dados Bandesa lan Prajuru Desa Adat wiadin Klian Banjar luwire :

1. Krama ngarep jangkep ;
2. Tan dados tulak ;
3. Kaadegang ring jeroning paruman ;
4. Sanistane mapendidikan pendidikan SMA sederajat ;
5. Mayusa pasasur ngantos nem dasa warsa ;
6. Sadurung ngamargiang swadarma kaprajuruan patut majaya-jaya lan kakukuhang ;
7. Matur piuning ring Kahyangan Tiga kaenter mangku Pura.

Pawos 41

Swadarma Prajuru Desa Adat :

1. Ngarincikang sahananin paridabdab desa adat ;
2. Ngarincikan Anggaran Pendapatan dan Belanja Desa Adat Besang Kangin ;
3. Ngalaksanayang pangrencana sane sampun kasungkemin ring jeroning paruman ;
4. Nginutin awig-awig utawi pararem Desa Adat ;
5. Nepasin sahanan wicara sane mapaketan ring Desa Adat Besang Kangin ;
6. Maridabdabin sahananin parikrama pakraman lan agama,nganutin sastra agama miwah dresta ;
7. Nyobyahang sahananin pamargin pakraman ring paruman utawi sangkepan;
8. Pinaka duta Desa Adat Besang Kangin, utawi Banjar Adat Besang Kangin pacang ngewentenang bebaos ring sapisira ugi manut pabuat.

Pawos 42

Wawenang Prajuru Desa Adat

1. Ngukuhang pangrencana sane kadabdabin olih Labda Pacingkremen Desa utawi LPD lan Bhaga Usaha Padruwen Desa Adat utawi BUPDA ;
2. Ngukuhang Rancangan Anggaran Pendapatan dan Belanja Desa Adat utawi RAPBDA dados Anggaran Pendapatan dan Belanja Desa Adat utawi APBDA satunggil ngawarsa ;
3. Ngawigunayang padruwen Desa Adat sajeroning ngamargiang swadarma prajuru ;
4. Ngadegang lan ngararianang Pengawas, Pengurus LPD , BUPDA, lan Pacalang risampune kacumponin olih Sabha Desa ;
5. Ngamargiang saseleh lan ngenterang sahananin parikrama Desa Adat ;

6. Nibakang sahanan pamidanda manut pamutus paruman ;
7. Ngangganin Desa Adat sajeroning midabdabin parilaksana hukum ;
8. Ngamargiang kawenangan siosan manut awig-awig lan pararem.

Pawos 43

Wewanengan lan Ngentosin Prajuru Desa Adat :

1. Wawanengan makamiwah senger dados Bandesa lan Prajuru Adat, luwire:
 - ha. Ngawit sakeng kakukuhang utawi majaya-jaya ;
 - na. Masa ayahan mewaneng limang warsa ngawit Purnama Kapat ngantos malih limang warsa Purnama Kapat ;
 - ca. Risampun kalih sasih pacang tugtug senger masa ayahan, kamargiang pangadegang antuk pararem panuntun ngadegang Bandesa lan prajuru desa adat Besang Kangin ;
 - ra. Sane wawu merarian ngrauhang bakal calon prajuru desa adat kalih jeeg prajuru sane mararian sane mawit kalih diri soang-soang tempek ;
 - ka. Sang mararaian manados Bandesa utawi Klian Banjar nenten dados kacalonang malih rikala punika. Risampun kaselag antuk bandesa utawi prajuru tiosan kangkat kaadegang prade nganutin gaguat.
2. Ngentosin Bandesa lan Prajuru Desa Adat sangkaning :
 - ha. sampun tugtug senger masa ayahan ;
 - na. lampus utawi seda ;
 - ca. tan prasida ngamargiang swadarman prajuru ;
 - ra. saking pinunas ngraga tur sampun kalugra olih Krama Desa Adat ring jeroning paruman ;

- ka. kanorayang ;
- da. Ngentosin prajuru patut kararemin olih krama, tur kawentenang pangilikita sane kasaksiang olih prajuru sane kapatutang ;
- ta. Bandesa utawi prajuru sane ngentosin mawaneng ngantos masa ayahan Bandesa lan prajuru sane madeg.

Pawos 44

Prajuru desa adat tan patut :

- ha. Mamurug awig-awig lan pararem ;
- na. Ngardi kaputusan ngarugiang krama utawi warga ;
- ca. Iwang ngawigunayang swadarma lan wawenang ;
- ra. Mbuat ngametuang biota ;
- ka. Dados angga Pengurus Organisasi Terlarang ;
- da. Merarian sedurung tutug sengker sajabaning nganutin pawos 43 (2)

Pawos 45

1. Bandesa lan prajuru sane iwang sasana miwah ngalinyokang padruwen desa, piwal ring awig-awig, pararem utawi paswara tur sampun mabukti, patut kadanda nikel ;
2. Bandesa lan Prajuru sane iwang manut (1) patut ngewaliang sehananing duwen Desa utawi Banjar, saha pramangkin kerarianang manados Bandesa utawi prajuru desa adat ;
3. Pamargin pakrama katuntun olih prajuru siosan ring sane karararianang.

Pawos 46

Olih-olihan Bandesa Adat miwah Prajuru Adat :

ha. Luput sahananing papeson ;

na. Polih tanding tengah saluwiring duman apahan.

Pawos 47

1. Sajeroning swadarma ngamargiang pangrencana pakraman, prajuru desa kaabih olih Angga Sabha Desa;
2. Sajeroning swadarma ngamargiang panepas wicara, prajuru desa kaabih olih Kerta Desa.

Pawos 48

1. Sabha Desa kasudi olih Bandesa, ring paruman Desa Adat makuweh 9 diri ;
2. Sabha Desa Adat mawiwit saking warga sane sujana lan Undagan Sabha Desa nganutin pararem ;
3. Sabha Desa maweh darma tatimbang majeng prajuru desa mina kadi: ngarincikang daging awig-awig lan pararem, ngarencanaang wawangunan, ngarencanaang APBDA,lan ngamargiang pawangunan desa ;
4. Wawanengan sabha desa ingkup ring wawanengan masa ayahan Bandesa lan Prajuru desa.

Pawos 49

1. Kerta Desa kasudi olih Prajuru Desa Adat majeeg 9 diri ;

2. Kerta Desa mawiwit saking prajuru desa, kawewehin antuk utusan warga sane maduwe kawagedan adat tur kasudi olih Bandesa. Bandesa Adat pinaka pamucuk sapisan angga Kerta Desa ;
3. Yening pamucuk utawi angga Kerta Desa wenten paiketan nyane risajeroning wicara, pamucuk utawi angga inucap nenten kapatutang nepasin wicara ;
4. Prade pamucuk Kerta Desa kawicaraang utawi wicara mapaiketan majeng pamucuk Kerta Desa, pamucuk Kerta Desa kagentosin olih angga sane mayusa pinih lingsir ;
5. Wawanengan Kerta Desa ingkup ring wawanengan masa ayahan Prajuru desa.

Pawos 50

Swadarma Kerta Desa:

- ha. Nampenin, nureksain, nepasin wicara ;
- na. Nepasin wicara mangda ngutamayang kasukertan madasar antuk druwenang sareng-sareng ;
- ca. Prade tan ngamolihang wiwit kadi aksara na, Kerta Desa nganutang manut daging awig-awig utawi pararem ;
- ra. Prade sang keni nenten nagingin kantos waneng limolas (15) rahina, sang mawicara utawi para pihak kangkat ngarauhang majeng Majelis Desa Adat manut undagan.

Pawos 51

Prajuru desa, Sabha Desa, Kerta Desa patut polih olih-olihan manut pararem.

Pawos 52

Desa Adat Besang Kangin maduwe makudang-kudang paiketan, minakadi:

1. Paiketan mangku inggih punika pupulan warga sane sampun katambyakan pinaka mangku. Angga paiketan mangku maswadarma kukuh ngamargiang darma kapamangkuan, nincapang kaweruhan lan kawagedan indik kapamangkuan, tur mautsaha manados panuntun pamargin ajaran agama miwah sida manados tatuladan;
 2. Paiketan sarati inggih punika pupulan warga sane sampun maduwe kaweruhan kalih kawagedan indik wawantenan tur sampun kacihna sampun mawinten kaseratian. Swadarma para angga ngukuhan wangun lan pamargin wawantenan manut sastra dresta kaadungan sareng dresta siosan. Para angga sarati mautsaha pinaka panuntun satunggil parikrama ngamargiang upakara, upacara manut pabuat;
 3. Paiketan werdha inggih punika pupulan warga sane sampun mayusa 60 warsa utawi langkung sane kaaturin galah lan genah nyagra kaseger-ogeran nyane tur kaange genah nunas piteket ;
 4. Pacalang inggih punika pupulan warga sane kaaturin swadarma widang kasutreptian lan kasukertan nganinin wawidangan desa rauh sadaging nyane:
 - ha. Pacalang kaadegang lan kararianang oleh Bandesa adat kadasarin antuk putusan Desa Adat Besang Kangin, ring paruman Desa Adat ;
 - na. Swadarma pacalang sane siosan inggih punika swadarma negara manut titah Bandesa utawi prajuru siosan ;
 - ca. Ring sajeroning nincapang kaweruhan, pacalang polih aguron-guron saking guru wisesa ;
 - ra. Pacalang polih olih-olihan manut pararem ;
 - ka. Swadarma pacalang kadabdabin nganutin tuntunan sasana pacalang ;
 - da. Tuntunan sasana pacalang kamedalan olih Majelis Desa Adat ;
-

- ta. Masa ayahan Pacalang pateh ring masa ayahan Bandesa lan prajuru.
5. Paiketan krama istri inggih punika pupulan istri krama lanang desa sane maswadarma ngarampih swadarma krama lanang kalih ngamargiang parikrama desa manut pabuat ;
 6. Pasraman inggih punika genah pangajah-ajahan utawi pauruk-urukan majeng warga nganinin Tri Kerangka agama Hindu tur parilaksanan nyane.

Pawos 53

Sekaa inggih punika pupulan warga sane kaadegang olih krama desa adat manut pabuat.

Sekaa-sekaa ring Desa Adat Besang Kangin :

- ha. Sekaa Gong Gita Darma Sasana;
- na. Yowana Desa Tunjung Mekar ;
- ca. Sekaa Santhi Gita Darma Ulangun;
- ra. Sekaa Klentangan Santi Langen Suara
- ka. Sekaa-sekaa siosan mapaiketan adat, agama lan budaya manut pabuat.

Pawos 54

Indik Sekaa Gong Desa Adat Besang Kangin :

1. Angga sekaa gong Desa Adat Besang Kangin inggih punika krama utawi warga sane maduwe kaonengan nabuh kasudi olih bandesa ;
2. Swadarma sekaa gong :
 - ha. Mautsaha waged nabuh ;
 - na. siaga satunggil wenten pamargi sane muatang sekaa gong ;

- ca. sutrepti rikala ngamargiang swadarma ;
 - ra. inut sahananing ilikita sekaa gong.
3. Swadikara angga sekaa gong :
- ha. Klian sekaa gong molihan peras gong satunggil ngayah nabuh ;
 - na. Polih panyanggra panyangu manut kawentenan ;
 - ca. Polih luputan rikala polih lilitan makemit, mebat, marerisak ring wawidangan:
 - ra. Nampenin kedengan: abalaganjuran utawi abarungan. Jinah kedengan puluk ngaranjing ring kas sekaa gong ;
 - ka. Prade piranti gong wenten kawon, prabeya katanganin olih sekaa gong , kakirangan nyane katuku olih desa adat.
4. Sekaa gong Desa Adat Besang Kangin, kamanggala olih kalih diri klian sekaa gong;
5. Sekaa gong Desa Adat Besang Kangin, kapesengin Sekaa Gong Gita Darma Sasana.

Pawos 55

Yowana Desa :

- ha. Anak-anaking krama sane sampun mayusa 15 tiban utawi sampun ngeranjing ring SMA/K kelas 1 ngantos mayusa 35 warsa tur durung marabian utawi nenten mipil mangde nyaluk manados angga yowana desa;
- na. Yowana Desa Adat Besang Kangin mawasta Yowana Tunjung Mekar ;
- ca. Yowana Desa patut ngarembe parikrama krama manut sesanannyane lan pituduh Bandesa lan Prajuru Desa Adat ;

- ra. Angga yowana desa mangda nyiagaan raga ring paajah-ajahan lan pauruk-urukan sahananin swadarma krama riantuk kapungkur manados panyelidihi.

Pawos 56

1. Sane manados angga Sekaa Santi inggih punika warga sane oneng masanti tur siaga ngamargiang sahananin swadarma sekaa ;
2. Swadarma angga sekaa santhi :
 - ha. Mautsaha weruh lan waged masanti ;
 - na. Tegteg nyagra kasusilaan sekaa ;
 - ca. Manados tatuladan pamargin suksaman sastra santi.
3. Swadikara :
 - ha. Kangkat ngayah manut pinunas tur molihang wak-wakan olih sang wenang;
 - na. Kasiagaang wawantenan marupa pajati asoroh;
 - ca. Polih panyangu manut kawentenan.
4. Sekaa Santhi sane wenten ring Desa Adat Besang Kangin :
 - ha. Sekaa Santhi Gita Darma Ulangun

Palet 3: Indik Kulkul

Pawos 57

1. Kulkul inggih punika piranti malakar taru sane sampun kacumponin pinaka tatengeran satunggil wenten parikrama pakraman ;
2. Kulkul sane wenten ring wawidangan Desa Adat Besang Kangin, minakadi:
 - ha. Kulkul Desa utawi banjar ;
 - na. Kulkul Sekaa gong ;

- ca. Kukul kalayusekaran ;
 - ra. Kukul Yowana Desa;
 - ka. Kukul Pajenengan Pura.
3. Kawigunan soang-soang kukul
- ha. Kukul sekaa gong kaswarayang manut parikrama angga sekaa gong ;
 - na. Kukul Pajenengan Pura, keswarayang saedan pujawali ;
 - ca. Kukul banjar utawi desa kaswarayang rikala pacang parum, sangkep, gotong royong, ngayah, bhaya, pawiwahan, rikala wenten kalayusekaran, utawi manut pabuat ;
 - ra. Kukul Yowana desa kaswarayang mapaiketan ring parikrama kayowanan;
 - ka. Kukul kalayusekaran kaswaraang rikala pacang kamargiang pamargi pabersihan sawa

Pawos 58

Tabuh tatepakan kukul :

1. Atuludan ring pangawit lan pamuput gancang, ring tengah banban: cihna patedunan krama utawi patus
2. Panjang banban ngantos apine udep: cihna wenten kapuunan
3. Atuludan bulus: cihna wenten anak ngamuk
4. Duang klentungan nyantet ping lima: cihna wenten kalayusekaran
5. Kalih tuludan sedeng: cihna warga pradana mawiwaha

Pawos 59

1. Kukul patut katepak olih klian utawi sane katitah klian. Tatepakan nyane manut pabuat ;
2. Warga sane katiben baya, sagelisne nunas pitulung, sepisanan nepak kukul utawi kawantu olih sang sane nangehang ;
3. Sang nepak kukul piwal ring pamargi kawigunaan nepak kukul, sang nepak patut kadanda manut pararem.

Palet 4: Indik Paruman

Pawos 60

1. Paruman Desa Adat Besang Kangin inggih punika parum sane kamiletin olih krama puluk, tur mawosang tata kasukertan pawongan rauh sadaging nyane ;
2. Paruman kamargiang sanistane ping tiga awarsa utamine ngindikang pangrancana, pertanggungjawaban pamargin pangrancana, lan pertanggungjawaban pengurus LPD.
3. Paruman padgata kala patut karihinin antuk arah olih saya sangkanin pituduh Bandesa utawi prajuru desa ;
4. Pasangkepan kamargiang nyabran ngasasih nemu Buda Wage kaanutan manut kawentenan ;
5. Krama sane nenten nyarengin paruman utawi pasangkepan neren ping tiga antes kaparerenga, Krama inucap patut katiwakin danda manut pararem.

Pawos 61

1. Parikrama sane kainggilang ring Paruman desa inggih punika:

- ha. Ngukuhang awig-awig ;
 - na. Ngukuhang Bandesa lan Prajuru ;
 - ca. Ngukuhang paridabdab mahautama pamargi pakraman.
2. Paridabdab mahautama madasar antuk Trihita Karana, minakadi:
- ha. Nabdabin desa adat ;
 - na. Ngarencana pawangunan desa ;
 - ca. Ngamargiang paiketan pantaraning desa adat ;
 - ra. Nabdabin padruwen desa adat ;
 - ka. Mutusang paimana rencana investasi ring desa adat ;
 - da. Ngadegang lan nabdabin LPD ;
 - ta. Nabdabin BUPDA ;
 - sa. Nguwah-nguwuhin padruwen desa ;
 - wa. Ngawangun sarana prasarana, adat istiadat, darma agama , dresta, seni budaya ;
 - la. Nincapang kaweruhang sajeroning pasraman ;
 - ma. Ngawerdiang lan ngawigunayang indik asal-usul, nilai adat, nilai agama, nilai sima, nilai seni lan budaya, miwah sane seosan manut pabuat.
3. Prajuru desa sane nenten ngalaksanaang paruman desa manut uger-uger, paruman kengin kalaksanaang olih angga Sabha desa sane mayusa pinih anom lan pinih lingsir ;
4. Putusan paruman desa ngiket warga desa.

Pawos 62

Sajeroning sangkepan, Bandesa utawi Prajuru Adat patut nambyakang :

- ha. Papeson munjuk lungsuring ayah-ayahan ;
- na. Pamargin panelas arta brana druwen desa ;
- ca. Pamargin usaha-usaha desa sane mabuat ;
- ra. Sahanan wicara lan pamutusnyane ;
- ka. Daging paruman miwah pasuaran-pasuaran sane mabuat ;
- da. Pidabdab prajuru nganinin usaha kertin desane kapungkur miwah sane sioasan ;
- ta. Nambyakang sahanan dadauhan guru wisesa.

Pawos 63

Paruman utawi Pasangkepan sida mamargi prade :

1. Risampune sang ngayahang langkung ring satenga jeeg krama ;
2. Karihinin antuk suaran kulkul ;
3. Pamilet mabusana adat (madestar, makwaca, makampung, mawastra malalancingan);
4. Pamilet nenten makta gagawan ;
5. Tan maren ngastiti Ida Bagawan Panyarikan macihna antuk ngarihinin ngaturang banten cane ring baduur meja sane kaaturang olih Bandesa ;
6. Pabacakan pangrauh kamargiang ring pamuput sangkepan ;
7. Saking ngawit rauh puput sang ngayah patut malinggih trepti, sadurung katitah kangkat matangi, sang ngayah tegteg malinggih ;
8. Sahanan pinaka pamutus mangda madasar antuk dasar tan piwal ring pamargi katah tur mawesana kabecikan ;
9. Prade rikala mutusang babawos tan sida antuk puluk, kaputusan antuk paswaran pinih akeh ;

10. Sang pamilet paruman utawi pasangkepan sane ngangganin krama nenten kangkat ngamedalang daging pikayun sajabaning mabuat olih paruman utawi sangkepan.

Pawos 64

Pamutus daging paruman utawi sangkepan kabawos rajeg risampuni kacumponin puluk utawi madasar paswaran sane akehan ;

Palet 5: Indik Padruwen Desa

Pawos 65

Padruwen Desa Besang Kangin, makadi ring sor:

ha. Kahyangan Desa :

- (1) Kahyangan Tiga (Pura Puseh, Pura Desa, Pura Dalem Agung).
- (2) Pura Prajapati
- (3) Pura Uluning Banjar
- (4) Pura Dalem Sakti Pingit
- (5) Pura Buwitan
- (6) Pura Taman Sari
- (7) Palinggih ring Pempatan
- (8) Pura Taman Pasucian Pura Puseh
- (9) Palinggih Pasimpangan Ida Batara ring Ped
- (10) Palinggih Pasimpangan Mlanting
- (11) Palinggih Pangadang-adang
- (12) Pasimpangan Ulun Danu
- (13) Panyiwian Palinggih Masceti

- na. Gong lan klentangan sejangkepnia;
- ca. Bale Banjar rauhing telajakannia ;
- ra. Tanah pakarangan Desa utawi tanah PKD, manut dresta sane sampun memargi kesukserahang ring krama Desa Adat Besang Kangin tur setinut ring daging awig-awig ;
- ka. Tanah setra (Jeeg nyane kasurat ring lepihan) ;
- da. Tanah Laba Pura (Jeeg nyane kasurat ring lepihan);
- ta. Labda Pacingkreman Desa utawi LPD ;
- sa. Jinah kas ;
- wa. Piranti Uperengga Pura ;
- la. Jempana ;
- ma. Kulkul ;
- ga. Piranti siosan sane mungguh ring ilikita Desa Adat salantur nyane;
- ba. CBD

Pawos 66

Olih-olihan Desa luire:

- ha. Olihan laba pura druwen desa ;
- na. Paica-paica saking guru wisesa ;
- ca. Urunan krama ;
- ra. Dana punia, aturan-aturan siosan sane patut ;
- ka. Sesarin canang ;
- da. Cacukuh pahan laba LPD.

Pawos 67

1. Prajuru patut ngenterang pamupon laba Pura lan druwen desa ;

2. Pikolih lan pamupon laba Pura ngaranjing ring kas desa ;
3. Tan kapatutang ngadol wiadin matiwakang druwen desa tanpa pamutus paruman utawi pasangkepan ;
4. Sahanan druwen desa mangda mawali ring desa ;
5. Sang ngaryanin tanah druwen desa lantur puput nyane kapuput ring jeroning pasangkepan ;
6. Warga Adat Besang Kangin patut nitenin tur mraktiyasayang druwen Desa;
7. Sang mandung druwen desa prade mabukti keni denda manut pararem saha ngewaliang ;
8. Pandung utawi maling sane tan sida kabuktiang sakala, desa adat patut ngawentenang padewasaksian manut kewentenan.

Pawos 68

Indik pamiara lan uger-uger ring setra :

1. Wawidangan setra patut kapiara;
2. Tanah pangurug lan gagumuk papendeman tan kangkat ngawigunayang sateos tanah setra ;
3. Setra Desa kangkat kawigunayang olih krama lan warga;
4. Ngaben nadak kangkat kamargiang prade nenten wenten piambeng tur sampun polih wak-wakan ring sangkepan ;
5. Ngaben nadak nenten kangkat ngedeng sajabaning sasih ngaben;
6. Ngaben masa kamargiang ring sasih karo.
7. Tan kangkat ngwangun undung-undung (rumah kubur)

Palet 6: Indik Pawiwahan

Pawos 69

1. Pawiwahan inggih punika, paiketan anak lanang kalawan anak istri malarapan antuk adung tresna tur sampun tegep nampenin tri upasaksi (manusa saksi, butha saksi, widhi saksi) miwah kailikitaang manut ilikita guru wisesa ;
2. Pidabdab pawiwahan ring Desa Adat Besang Kangin, ngemanggehang kapurusan, sang purusa sane ngalap rabi tur kapaumahang ring sang kapurusa ;
3. Rupa pawiwahan :
 - ha. Pawiwahan lumrah : pawiwahan sang lanang rumaga purusa ;
 - na. Pawiwahan nyantana/nyeburin : pawiwahan sang istri rumaga purusa.
4. Paridabdab pawiwahan :
 - ha. Pepadikan : sang kulawarga purusa madarma suaka majeng sang kulawarga pradana. Pamargine :
 - 1) Nyedek: sang pacang mawiwaha kapurusa kasarengin guru rupakan nyane matemuwirasa majeng sang pacang mawiwaha kapradana kasarengin guru rupakannyane ;
 - 2) Maplaku: sang pacang mawiwaha kapurusa sane kasarengin guru rupakan nyane rauhing pasemetonan guru rupaka matemu wirasa majeng sang pacang mawiwaha kapradana kasarengin guru rupaka rauhing pasemetonan guru rupakan nyane
 - 3) Amet-pinet: sang pacang mawiwaha kapurusa ngambil sang pacang mawiwaha kapradana sane katodia olih pasemetonan utawi krama tur kaupasaksi antuk triupasaksi.

- na. Ngerangkat : sang purusa antuk sasiliban ngambil sang pradana. Salanturnyane, kulawarga sang purusa ngamargiang :
- 1) Nyedek : Utusan sang kapurusa malarapan swalapatra pajanten sakeng sang mawiwaha masadu ajeng majeng guru rupaka sang kapradana sane karampih olih manggala dinas kapradana. Rikala puniki kamargiang adung babawos pamargi salantur nyane ;
 - 2) Maplaku : pasemetonan sang kapurusa matemu wirasa majeng pasemetonan sang kapradana ngindikang pamargin pawiwahan ;
 - 3) Maupasaksi: sang mawiwaha sane karampih olih pasemetonan sang kapurusa tur katodia manggala adat lan dinas matemu wirasa majeng pasemetonan lan manggala adat lan dinas pasemetonan kapradana.
5. Warga kapurusa prade ngambil kapradana seos agama pamargi kaanutang manut kawentenan. Sang pradana patut masudawadani malarapan manah ngraga. Prade nenten masudawadani tan patut kasarengan ngamargiang eedan pamargin pawidiwidanan. Sane mawidiwidana wantah sang purusa ;
6. Warga kapradana prade kaambil olih seos agama tegteg ngamargiang pamargin adat/awig-awig.

Pawos 70

1. Sang kaicalan warga patut digelis masadok ring Klian, nunas pamitulung pacang maseserep;
2. Klian ngenterang pemargine maseserep, tur mangda nganutin tata kramaning desa ;
3. Paseserep patut sampun polih wakwakan prajuru.

Pawos 71

1. Warga mawiwaha kangkat ngamaduang prade malarapan pamargi rahayu tegteg molihang upasaksi bendesa utawi prajuru, prade lempas patut kadanda manut pararem ;
2. Warga sane mawiwaha tan rahayu utawi kantun kawicaraang, wicara patut kabuntasang, wawu molihang upasaksi ;
3. Jadma deha mobot, utawi sang majangkepan mobot keni cenidra, utawi sang balu luh mobot sadurung wenten ngangkenin patut digelis kadabdabin Bendesa, tur digelis karerehang pamunceh pamargi.

Palet 7: Indik Nyapihan

Pawos 72

1. Sang palas merabian tur sampun kailikitaang kebawos nyapihan ;
2. Sang kabawos nyapihan risampune maduwe akta perceraian ;
3. Sang palas marabian yadiastun sampun kadabdabin olih kulawarga lan prajuru nenten taler sida masikian, dados nyapihan malarapan swalapatra pajanten kawewehin saha uning manggala adat lan dinas purusa pradana.

Pawos 73

1. Sang nyapihan adung mawali alaki rabi utawi masomahan patut naur danda manut pararem tur pamargine nginutin makadi pawiwahan anyar ;
2. Sang nyapihan prade katangehan matemu wirasa kadanda manut pararem.

Pawos 74

1. Balu luh katinggal muanin nyane utawi balu sane pecak nyeburin, patut ngemargiang swadarma kadi ring sor :
 - ha. Ngemanggehang kepatibratan ;
 - na. Ngemarginin ayah krama manut pamargi ;
 - ca. Ngeraksa, nguasayang, lan miara warisan lan sentanan nyane ;
 - ra. Tan dados ngadol warisan sedurung polih wakwakan saking kulawargan sang lanang;
 - ka. Kawenang mawiwaha sangkaning rahayu.
2. Balu sane tan pageh ring swadarma, luwire :
 - ha. Matingkah dretikrama, miwah salah solah sane siosan ;
 - na. Matilar tan pasadok ;
 - ca. Lempas ring swadarmaning balu, utawi salah prawerti.
3. Balu sane tan pageh wenang katundung saha tan polih pahpahan waris ;
4. Balu tan pasentana, prade kawaliang olih wargania kapurusa, utawi sangkaning pinunas rahayu patut polih pahpahan paguna kaya.

Palet 8: Indik Santana

Pawos 75

1. Sentana inggih punika sang panglantur swadarma swadikara ;
2. Sentana kepeh manados :
 - ha. Preti sentana/sentana rajeg : katurunan buah basang sang makurenan ;
 - na Sentana peperasan : panglantur swadarma lan swadikara pakurenan sangkaning ngidih manut paridabdab.

Pawos 76

Paridabdab ngidih sentana :

1. Sane patut kaperas anggen sentana, kadi ring sor :
 - ha. Sang keperas megama Hindu ;
 - na. Sakeng waris pancer kapurusa ;
 - ca. mawiwit saking keluarga tunggal sanggah utawi merajan, paibon, lan dadia ;
 - ra. Yening tan wenten utawi tan polih paadung saking pancer kepurusa, kengin mawiwit saking keluarga sapa sire ugi.
2. Paperasan sinanggeh puput, macihna :
 - ha. Sampun ngamargiang pawidhi-widhanaan paperasan ;
 - na. Kaupasaksi manggala adat lan dinas, saha katambyakan ring paruman ;
 - ca. Maduwe ilakita.

Palet 9: Indik Warisan

Pawos 77

1. Warisan inggih punika : tetamian arta brana, saha ayah-ayahan ngupadi sukerta sekala niskala saking kaluhurannya, marep ring turunannya ;
2. Sane kaucap warisan luwire :
 - ha. Duwe tengah, karang paumahan, pemerajan ;
 - na. Pegunakayan, tatadan, jiwadana, lan utang piutang.
3. Wawu kengin kebawos waris, inggih punika :
 - ha. Wenten sang mapiturun warisan ;
 - na. Wenten turunannya, ahli waris ;
 - ca. Wenten arta brana miwah tetegenan utawi ayah-ayahan merupa warisan.

4. Sane kebawos ahli waris, inggih punika :
 - ha. Preti sentana lanang ;
 - na. Sentana rajeg ;
 - ca. Sentana peperasan lanang utawi wadon.

5. Prade tan wenten sekadi ring ajeng, kang sinanggeh ahli waris :
 - ha. Turun purusa pernah ngunggahang, sekadi rerama dia, rerama dimisan, rerame dimindon ;
 - na. Turun purusa pernah kesamping, mekadi ponakan, misan, mindon ;
 - ca. Prade camput,tan wenten ngelingin, upakarania kemargiang olih krama.
Druwenyane kaambil Desa.

Pawos 78

1. Swadarmaning ahli waris patut nerima saha ngusahayang tetamian ayah-ayahan saking keluhuranne mekadi ngerempon sanggah, Pura dadia, Pura kahyangan, saha pekarangannya;
2. Ngabenang sang ngewarisang saha ngelanturang upakara pitra yadnya sepatutnya ;
3. Naurin utang-utang sang ngewarisang pamekas utang ring desa wiadin ring Pura lan utang-utang sane siwosan.

Pawos 79

1. Pengepahan warisan kangkat kemargiang sekadi sor :
 - ha. Risampun ngelaksanayang pitra yadnya lan utang piutang sang ngewarisang sampun buntas ketawur ;
 - na. Warisan sangkaning arta brana paguna kayan kaepah pada ;

- ca. Karang ayahan desa kaemong antuk ahli waris kang sinanggeh pinih marep.
2. Sinalih tunggil ahli waris ring ajeng, tan polih pahpahan wewarisan prade ipun :
- ha. Alpaka guru rupaka, utawi guru swadiyaya ;
- na. Merupa sentana rajeg, sane sampun kesah mewiwaha malih ;
- ca. Merupa sentana lanang, sane mewiwaha nyeburin kepekurenan lian.
3. Sentana ahli waris sane nilar Agama Hindu, keangkat polih pahpahan waris paguna kayan kemaon, ten pisan kangkat ngambil karang ayahan desa ;
4. Yening wenten sentana luh ngelaksanayang lokikasanggraha (nyilih polah) mewastu madrebe pianak kewastanin sentana alpaka guru ;
5. Yan anak ipun keakuin ring penglingsirnya, kengin pianak punika ngewaris paguna kayan reramane luh kemawon ;
6. Sane kangkat ngewaris paguna kayan :
- ha. Balu luh ;
- na. Balu muani sane mawit saking mawiwaha nyeburin ;
- ca. Sang mulih deha, seantukan ring pawiwahane dumun sampun kaucap ninggal kedaton.
7. Sekantune maurip ipengelingsir kangkat ngewehin jiwa dana tatadan, utawi bekel maka cihnapaweweh ring pianake sane mawiwaha.

Pawos 80

Prade sejeroning keluarga wenten ahli waris langkung ring adiri, patut :

ha. Kawentenang paigum indik pedum waris inucap ;

na. Yening tan presida katunasang tatimbang ring Bandesa ;

ca. Prade tan wenten taler nganutin ring penepas Bandesa, kengin nunasang ring sang wenang rumawos.

Pawos 81

Karang ayahan desa kaputungan ahli waris patut kaparidabdab desa adat, prade tegtegententen wenten kayun ngalinggihin, karang inucap mawali ka desa.

Palet 10: Indik Panyanggran Banjar

Pawos 82

1. Sahananin parikrama adat, agama, lan budaya sane kamargiang olih Desa Adat Besang Kangin tan kapatutang wenten panyanggra lanjutan tur tan kangkat wenten ngalanjar ;
2. Sang mamurug kecap 1, kebaosin tur keni pamidanda manut pararem.

Pawos 83

1. Warga Desa Adat Besang Kangin sane nangun yadnya ala utawi ayu kengin nunas pitulung majeng krama utawi warga desa adat karihinin antuk wenten pisadok sakeng aduwe yadnya majeng prajuru ;
2. Yadnya merupa karya kelayusekaran utawi pitra yadnya, patut karombo olih krama banjar ;
3. Warga utawi Krama Desa sane nunas pitulung majeng krama desa kengin ngaturang panyanggra saka sidan.

SARGAH LIMA

SUKRETA TATA PALEMAHAN

Palet 1: Karang, Tegal, Carik, miwah Setra

Pawos 84

1. Tanah pekarangan Desa utawi tanah paumahan, patut wenten ngayahang tur jumenek irika ;
2. Tanah pekarangan utawi tanah paumahan kangkat kapetimbang malarapan antuk putusan sangkepan ;
3. Tanah pekarangan sane katinggal camput katangkeb` desa adat tur kawigunayang manut pabuat. Sang ngalinggihin tanah inucap kaupakara olih desa adat ;
4. Tanah pekarangan utawi tanah paumahan sane katinggal sangkaning wusan makrama kabanggiang masengker 2 warsa. Lintang ring 2 warsa mawali kadruwe desa adat tur kawigunayang manut pabuat, pamutus nyane ring jeroning sangkepan;
5. Tanah pekarangan utawi tanah paumahan kangkat kawarisang sakantun sang ngawarisan kantun murip tur kantun tegteg makrama ;
6. Karang, tegal, carik, patut sekadi ring sor :
 - ha. Wenten wates ;
 - na. Mapemedal ka rurung utawi ka margine ;
 - ca. Wenang kewehin sombah, utawi penguras toya ;
 - ra. Maguna saha tan ngawinayang keduhkitan.
7. Wates karang nepi margi utawi ulu, utawi tanpa panyanding, patut kadabdabin olih sang aduwe Karang, tur tan kangkat ngalahlah. Mabukti ngalahlah, patut katiwakin danda manut pararem, minakadi:
 - ha. Ngewaliang tanah sane kelalah ;

na. Ngewehin prabiya sekadi patut ;

ca. Yan sane kalahlah marupa genah sane suci krama inucap keni pamidanda pangupakara manut tatacara agama.

Pawos 85

1. Krama Desa Adat sane sampun ngeraksa karang desa ndiri tan kapatutang malih nunas karang desa, ngangkep karang desa ;
2. Sang nglinggihin karang desa patut ngawigunayang karang manut cacukuh.

Palet 2: Indik Wawangunan

Pawos 86

1. Krama utawi warga Desa tan kapatutang, mekarya wewangunan nyapcap kepakarangan wewangunan anak sios ;
2. Yening pacang mekarya rurung, linggah ipun kapatutang adepa agung, adepa belah, adepa ;
3. Rurung sane katangun kadasarin antuk paigum sang aduwe tanah lan sang sane pacang ngawigunayang tur kasobyahang ring pasangkepan ;
4. Tan kapatutang ngenahang barang padruwen, ring margi utawi rurung Desa Adat Besang Kangin ngantos mgemetuang pikobet ring margi ;
5. Sahananing margi sane wenten ring wawengkon Desa Adat Besang Kangin, kapatut taler polih pitulung pamiara keasrian saking krama Desa Adat Besang Kangin, pinaka penyanggra Krama Desa Adat marep ring Guru Wisesa, saha miara keasrian wewidangan ;
6. Tan wenang ngewentenang wewangunan, sajeroning kakuwub margi ;

7. Warga desa adat Besang Kangin sane pacang mapetimbalang tanah patut masadok tur pastika molihang uwak-uwakan Bandesa utawi prajuru ;
8. Warga dura desa adat Besang Kangin sane mapatimbalang tanah ring wawidangan Desa Adat Besang Kangin patut malarapan saha uning Bandesa lan prajuru ;
9. Wawangunan sane tan nganutin tata ngawangun lan tata ngawigunaang genah, jantos nyayubin bilih-bilih tembok ring telenging wates, risampun kawara tur sampun kasadokang wenang kapidanda manut pararem ;
10. Nenten dados ngawangun banjar lan setra anyar ring wawidangan Desa Adat Besang Kangin ;
11. Sang piwal sakadi inucap ring ajeng angka (1) rauh ring angka (7), patut kebaosin lan keni pamidanda manut perarem.

Palet 3: Indik Wawalungan

Pawos 87

1. Warga Desa Adat Besang Kangin sane maubuh-ubuhan, ubuh-ubuhan nyane patut kadabdabin mangda ngawinang rena ;
2. Ubuh-ubuhan sane ngawetuang baya, sengkala, usak utawi leteh, cemer, sang aduwe ubuh-ubuhan inucap patut nanggung prabea sang kabaya, kasengkalen, kausak, utawi ngawaliang kasucian sane kaletihin utawi kacemerin ;
3. Sang sapa sira ja tan kapatutang maboros, mabedilan, ngarereh ulam ring wawidangan Desa Adat Besang Kangin, sajabaning sampun polih wak-wakan Bandesa utawi prajuru desa, sang piwal patut kadanda manut pararem ;
4. Sang sapa sira ja tan kawenang ngenahang utawi negulang ubuh-ubuhan ring:
ha. Wawidangan parahyangan ;

na. Dura tegalan, carik, utawi teba ;

ca. Wawidangan setra.

Palet 4: Indik Kakayonan

Pawos 88

1. Nandur tanem tuwuh mededampingan ring genah parahyangan wiadin paumahan, paembangipun saking panyengker ka jero pinih kidik adepa agung ;
2. Kakayonan sane kapitahen pacang ngerawuhang baya, kangkat katundung. Sang nundung nyiagaang prabea, sang aduwe taru muputang. Prade ngawetuang baya, katanggung olih sang aduwe taru. Utawi kapuputang antuk paigum sang nundung lan sang aduwe taru ;
3. Prade tan sida ngembasan paigum, Bandesa lan prajuru tedun ngarauhang panepas, tur panepas suka tan suka antas katampenin ;
4. Taru sane ngawinan baya, sang aduwe taru patut mrabeanin sategepne ;
5. Tan kapatutang nekteb utawi ngebah taru ageng wiadin sane kasinanggeh mabuat wigunannia manut kawerdian lingkungan, sadurung polih uwak-uwakan saking prajuru desa, manut paiguman Krama Desa Adat ;
6. Krama desa patut ngamanggehang kawentenan resesikan tanem tuwuh sane ngawinang desane asri, tur lestari luire :
 - ha. Tanem tuwuh sane katandur utawi kapiara antuk desa utawi banjar;
 - na. Tetamanan desa;
 - ca. Margi utawi rurung, tlajakan.
7. Sapa sira sane ngrusak tanem tuwuh ring ajeng wilangan 5, patut keni pamidanda manut pararem.

Palet 5: Kareresikan Desa Adat

Pawos 89

1. Warga Desa Adat Besang Kangin mangda tegteg miara kabersihan, kaasrian wawidangan parahyangan lan palemahan, wenten tan wenten titah saking Bandesa utawi prajuru ;
2. Krama, warga, lan tamiu sane wenten ring waidangan Desa Adat Besang Kangin patut stata nyagra kabersihan wawidangan ;
3. Sahananin mis sane metu sakeng raga, wawidangan ngraga patut kadabdabin sabecik-becikne utawi kagenahang ring wadah mis sane sampun kasiaga ;
4. Sahananin mis patut kapilah tur kawadah. Mis plastik mapupul mis plastik, mis don-donan mapupul mis don-donan, blah-blahan mapupul blah-blahan ;
5. Warga Desa Adat Besang Kangin mangda matitetin ngangge plastik ;
6. Soang-soang warung, penggak utawi genah mausaha patut nyiangaang genah mis manut papilahan ;
7. Sahananin mis tan kapatutang kaentungang ka dura karang utawi tanah duwe, sajaba sampun maduwe genah mis sane sampun kapastika oleh desa ;
8. Banyu, pamasuhan, yeh umbah-umbahan, yeh blengbeng utawi sakeluwir nyane tan kapatutang ngaromonin ka dura karang utawi tanah duwe ;
9. Sang sapa sira ja tan kapatutang mabacin ring jalinjing, telabah, utawi tukad;
10. Sang sane ngawigunaan toya jelinjing, telabah, utawi tukad, bilih-bilih angge masiram, mangda tegteg nyagra kasopanan ;
11. Mis sane metu sangkaning upakara utawi upacara mangda kapuputang ring wawidangan genah ngamargiang upakara utawi upacara ;

12. Sang sapa sira piwal utawi murug tan nganutin nyagra kabersihan kakeninin danda manut pabuat.

SARGAH NEMNEM

WICARA, BHAYA, DUSTA, LAN PAMIDANDA

Palet 1: Indik Wicara

Pawos 90

1. Sane patut mutusang pamunceh wicara ring Desa Adat Besang Kangin, inggih punika Prajuru Desa Adat ring jeroning sangkepan utawi paruman ;
2. Pamutus pamunceh wicara mangda nganutin daging awig-awig, petitis lan pamikukuh Desa Adat Besang Kangin, lan ilikita guru wisesa sane paiketan nyane ;
3. Satunggil wenten wicara, wicara karerehang pamunceh olih Bandesa lan prajuru karampih olih Kerta desa. Pamutus pamunceh wicara tegteg ring jeroning sangkepan utawi paruman. Prade indik wicara tan prasida molihang pamutus olih Prajuru Desa Adat, patut wicara punika katur ring Kerta desa.
4. Prade nenten molihang pamutus wicara, wicara katunasang pamunceh ka Majelis Desa Adat manut undagan.

Pawos 91

1. Sehananing wicara sane mapaiketan ring agama, adat, patut kebawosin olih Prajuru Desa Adat sane karampih Kerta Desa, tur keni pamidanda manut pararem ;
2. Malih yan wenten sinalih tunggil krama Desa Adat Besang Kangin mewicara nyewenggara wiadin ngawentenang bawos kawon, ngemetuang manah sungsut ring anak siwos patut digelis kebawosin olih klian Banjar utawi Bendesa Adat ;

3. Pamutus patut pastika, nyantenang kaiwangannya utawi lempas ring daging awig-awig Desa Adat Besang Kangin.

Palet 2: Indik Bhaya miwah Dusta

Pawos 92

1. Sakancan pabuat tan rahayu utawi sakancan sane ngawinang pikobet, dukkita, duskerta ring raga utawi jadma siosan kasinanggeh bhaya ;
2. Bacakan sane kabawos bhaya, luire:
 - ha. Jiwa bhaya : Kaamuk, kabaak, lan kaparikosa;
 - na. Artha bhaya : Kamalingan, kabegalan ;
 - ca. Geni bhaya : Katunuan utawi puun;
 - ra. Toya bhaya : Anyud ketiben arus;
 - ka. Bhayu bhaya : Katiben linus;
 - da. Karipu bhaya : Bhaya sangkanin duratmaka.

Pawos 93

1. Warga Desa sane katiban bhaya, mangda digelis atur supeksa majeng prajuru utawi sang wenang memaosin ;
2. Warga Desa sane uning sane ngawinang bhaya, patut digelis atur supeksa majeng prajuru utawi Guru Wisesa ;
3. Warga sane ketiban bhaya ageng, sang katiban bhaya utawi sang amangguh, wenang digelis nepak kulkul cihna bhaya tur atur supeksa majeng prajuru utawi sagelisne nunas pitulung ;

4. Warga sane nyingak utawi mireng kulkul cihna bhaya patut sayaga mapitulung ngeromba saha makta gegawan, manut kewentenan bhaya punika, tur patut ngeromba sang keni bhaya manut duhkitannyane, sih dana miwah siyosan.

Pawos 94

1. Pamargi maseserep utawi ngeledahin, ritatkala wenten kemalingan, patut nunas panguak dumun majeng Prajuru utawi Klian Banjar ;
2. Pamargi maseserep tios bebanjaran utawi Desa, patut polih panguak sakeng Prajuru utawi Klian Banjar wiyadin Klian Desa inucap ;
3. Prajuru patut nuntun pamargin tingkah maseserep mangda nenten ngawetuang pikobet.

Pawos 95

1. Sang melaksana dusta, sang ngawinang baya sane sampun mabukti patut kadanda, tur ngalantur ngamargiang pamutus krama wasana (akibat perbuatan) ;
2. Prade mayanin ngrusak utawi ngemaling druwe sane kesinanggeh suci, pamidanda punika patut maweweh penyanggaskara caru utawi prayascita manut sastra agama ;
3. Warga Desa Adat Besang Kangin mangda sumeken ngamargiang tata-titi pamargin agama manut catur dresta. Prade piwal patut kabawosin ;
4. Dusta saking dura Desa Adat Besang Kangin, prade sida katangehan patut kasadokan majeng sang wenang tur mangda naur panuku manut wasana pabuat nyane ;
5. Warga utawi tamiu sane ngumam-ngumam ring wawidangan Desa Adat Besang Kangin patut kadanda manut pararem.

Palet 3: Indik Pamidanda

Pawos 96

1. Desa Adat Besang Kangin, wenang nibakang pamidanda majeng warga sane sampun mabukti lempas ring daging awig-awig ;
2. Pamidanda katiwakang oleh Bandesa utawi prajuru ring jeroning sangkepan utawi paruman. Indik petetiwak pamidanda patut kelaksanayang olih Prajuru Desa Adat Besang Kangin;
3. Bacakan Pamidanda:
 - ha. Panca pamidanda :
 - (1) Tulak minci, manut pararem ;
 - (2) Pangererenga, manut pangelokika pekaryan ;
 - (3) Melencerin, manut sekadi dosan mekarya apisan ;
 - (4) Penyagsag wirasa, manut pemargi dedosan mekarya pang kalih ;
 - (5) Angrugada Klian keni danda manut pararem.
 - na. Pamidanda siwosan:
 - (1) Ayah-ayahan penukun kasisipang ;
 - (2) Denda arta (dedosan saha panikel-nikelannya, utawi panikel paturunan) ;
 - (3) Pangupakara lan pengaskara ;
 - (4) Rerampagan (melelang) ;
 - (5) Ngewaliang tanah karang desa ;
 - (6) Kasepekang ;
 - (7) Kanorayang.
 - ca. Agung alit pamidanda manut daging pamutus paparuman.

4. Jinah utawi raja brana saking pamidanda manados druwen Desa Adat Besang Kangin.

Pawos 97

Krama Desa Adat Besang Kangin tan nawur paturunan, paputran utawi dedosan risampune rauh panemayannia pacang nawur, patut keni panikel manut pararem.

Pawos 98

1. Warga desa sane ngeseng (nenten pitra yadnya) utawi mendem sawa sateos ring setra desa, warga inucap keni pamidanda manut pararem saha nglaksanayang pamarisudha desa manut pituduh sang ngawi wenang tur sawa inucap kaanutang genahne ;
2. Warga sang rumaga putus utawi sampun madwijati, pitra yadnyan nyane kamargiang manut dresta, prade piwal patut kabawosin ;
3. Warga sane makarya bangbang pacang nandur kekayon kirang ring adepa agung patut keni pamidanda manut pararem saha pramangkin ngurug bangbang ;
4. Warga sane ngutang luwu, wangken wawalungan miwah kotoran sane siosan ring margi agung, got miwah genah sane tan manut, kapidanda manut pararem ;
5. Sahananing sane kausak olih wong edan, sahananing sane kausak inucap patut kategenang manut pabuat olih kapatutan sang wong edan ;
6. Warga utawi tamiu sane marebat ring wawidangan Desa Adat Besang Kangin wenang kadanda manut pararem ;
7. Warga utawi tamiu sane ngamuk ring wawidangan Desa Adat Besang Kangin wenang kadanda manut pararem ;

8. Warga sane cuntaka yening ngranjing ke pura patut keni pamidanda manut pararem, saha panyapuhan pamrayascita ;
9. Warga utawi tamiu sane masang pangalah dewa, mendem sahanan rarempon sarwa leteh ring Pura patut keni pamidanda manut pararem saha ngwentenang panyapuhan ;
10. Tamiu sane madunungan ring wawidangan Desa Adat Besang Kangin sang nampi patut masadok majeng prajuru. Yening tan masadok, napi malih tamiu punika kasinanggeh dusta, sang nampi tamiu keni pamidanda manut pararem ;
11. Warga Desa Adat Besang Kangin. Sang malaksana keni pamidanda manut pararem;
12. Warga Desa Adat Besang Kangin sane manggihin sang piwal ring awig-awig, prade tan nyadokang, warga inucap patut keni pamidanda ;
13. Sahanan pamidanda patut ngangge gaguat utawi uger-uger manut pararem.

SARGAH PITU

NGUWAH UWUWIN AWIG-AWIG

Pawos 99

1. Nguwah kalih nguwhin awig-awig patut kelaksanayang antuk Paruman Krama Desa Adat Besang Kangin ;
2. Perareman inucap patut malarapan gilik saguluk perarem Krama Desa Adat Besang Kangin ;
3. Pamutus bebawosan presida yan sampun kramane gilik saguluk utawi kengin mejalaran pasuaran (wewilangan suara) ;
4. Mejalaran antuk wewilangan suara, geguatnya sekadi ring sor :

ha. Krama Desa sanistanya apahan, lintang asiki.

SARGA KUTUS

SAMAPTA

Pawos 100

1. Awig-awig puniki kewastanin, Awig -awig Desa Adat Besang Kangin ;
2. Awig-awig puniki kemargiang ngawit saking keraremin olih Krama Desa Adat Besang Kangin ;
3. Awig-awig Desa Adat Besang Kangin puniki manggeh kalih kelaksananyang ring wewidangan warga lan Desa Adat Besang Kangin ;
4. Awig-awig Desa Adat puniki nganinin sahanan warga lan krama Desa Adat Besang Kangin, lan sehanan sane kekuwub antuk Desa Adat Besang Kangin.

Pawos 101

Saluiring pamargi pakraman sane durung kabawos utawi durung munggah ring sajeroning awig-awig puniki, manggeh kelaksananyang manut tata cara sane sampun ketah memargi, kedulurin antuk pasuaran/pararem.

Pawos 102

1. Awig-awig puniki kalinggatanin olih Bandesa lan Prajuru Desa Adat ngangganin warga Desa Adat Besang Kangin ;
2. Awig-awig puniki kasurat, kararemin tur kamanggehang duk rahina Saniscara Umanis Wuku Watugunung, panglong ping 9, sasih Kadasa, Icaika 1944. tanggal masehi 26 Maret 2022, ring Desa Adat Besang Kangin ;

3. Luwir sang sane ngalingga tanganin:

- ha. Krama Desa Adat Besang Kangin manut bacakan kasurat ring lepihan ;
- na. Prajuru Desa Adat Besang Kangin :

Bandesa Adat Besang Kangin,



[Signature]
Komang Wiyasa

Panyarikan,

[Signature]

I Wayan Susila

Patengen,

[Signature]

I Ketut Merta Yasa

Pangrampih,

Majelis Desa Adat Kabupaten
 Klungkung
 Bandesa Madya,

[Signature]

Dewa Made Tirta, S.Pd., M.Pd.

Majelis Desa Adat Kecamatan
 Klungkung
 Bandesa Alitan,



[Signature]
I Wayan Budarsana

Saha Uning
 Majelis Desa Adat Provinsi Bali.

Bandesa Agung,

[Signature]

Panyarikan Agung,

[Signature]

PANGELINGSIR AGUNG PUTRA SUKAHET **Dr. DEWA NYOMAN RAI ASMARA PUTRA, S.H., M.H.**

Telah Dicatatkan

Pada Dinas Pemajuan Masyarakat Adat Provinsi Bali

Tanggal : 24 Desember 2024

Registrasi Nomor : A/0023/1388/051/08/DPMA/2024